



Stgaffi in suttetg per tuts

Falera ha renovà ed engrondì l'areal da scola e collià quel cun il center communal.

9

Natürlich aus dem Eichenfass



südostschweiz

LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

Mobbing – depressiun – suicidi

■ (anr/hh) In plaid offendend, ina leffa, in stausch, ina frida ni ina disfamaziun persunala en ina media sociala: Mobbing ei in problem derasau ella societad e sa haver grevas consequenzas. La mesjamna sera han *Marcus Corai* e *Cuno Berther* dil Post da prevenziun da criminalitad e protecziun dalla giuventetgna dalla polizia cantunala dil Grischun orientau a Mustér davart il mobbing. A quell'orientaziun ha Giuventetgna Cadi envidau e la menadra da quella, *Gabriela Cabalzar*, sa bein avunda daco ch'ella ha fatg quei: «Nus havein adina puspei enconuschientscha da tals cass.» Corai ha referiu davart il problem surtut denter ils affons e giuvenils ed era presentau entginas cefras en quei connex. Ellas pertucan il telefonin, respectivamein las medias socialas che vegnan nezegiadas pli e pli pil mobbing.

➤ PAGINA 7

Satisfacziun per Rudolf Hanimann

■ (anr/fa) L'anteriuor veterinar ch'antunat *Rudolf Hanimann* es gnü absolt da l'achüsa d'avair fat abüs d'uffizi. Il Gündisch districtual En es gnü a la conclusiun cha las cumprouvas per quist abüs nu sajan indubitablas. Avant ün decenn d'airan ils paurs in Svizra obliats da vaccinar lur muvel cunter la malatia da la lingua blaua. *Tumesch* e *Seraina Planta* nu laivan laschar vaccinar lur bescha. Per cha quella nu gnia in contact culla bescha vaccinada da Scuol vaiva il veterinar ch'antunat fat vaccinar la scossa dals Plantas. Il pèr ha perquai achüsa a Hanimann d'avair fat abüs d'uffizi. In gövgia ha tratà il Gündisch districtual En cul president *Orlando Zegg* il cas in chasa cumünala a Scuol.

➤ PAGINA 11

Fiasta gronda a Lumbrein

■ (anr/abc) L'ovra electrica Lumbrein datti exact dapi 100 onns. Il romanist e linguist *Clau Solèr*, ei s'occupaus culla historia da quell'ovra. Siu tat Gion Bistgaun Capaul ha suttascret igl october 1918 il contract per las installaziuns electricas en baghetgs. *Anita Capaul* e *Clau Solèr* presentan sonda proxima il cudisch ch'ei cumpariu pigl anniversari da 100 onns.

➤ PAGINA 7

Franar construcziun sparpagliada

Las retschertgas quintan cun in resultat filà tar l'iniziativa «per in svilup durabel dals abitadis»

DA MARTIN CABALZAR

■ En trais emnas decida il suveran svizzer davart l'iniziativa dal pievel «Franar la construcziun dischordinada» lantschada dals giuvenils verds. L'iniziativa vul franar in'ulteriura estensiun da las zonas da bajegiar.

Trais emnas avant la votaziun chatta l'iniziativa anc adina ina majoritad, sco quai ch'ina segunda retschertga represchentativa da Tamedia mussa. En cumparegliaziun cun l'emprima retschertga fatga curt avant Nadal è quai ina sminuaziun da dus perschiants. Chatta il project en l'emprima retschertga anc il sustegn da tut las partidas, cun excepziun da la pld e da la pcd, giuoda el actualmain sulettain il sustegn maioritar dals verds (85%), dals socialdemocrats (70%) e dals verd-liberals (67%). Malgrà questa tendenza negativa pleda *Luzian Franzini* dal comité d'iniziativa d'in «resultat legravel», tant pli ch'ils adversaris da l'iniziativa hajan surtatgà l'entira Svizra cun placats cun la parola «na». Damai che las leschas actualas na possian betg impedir ina construcziun dischordinada saja l'iniziativa la cumplettaziun idea-



En il mument chatta l'iniziativa per in svilup durabel dals abitadis anc ina maioritad tar il suveran.

MAD

la tar la lescha vertenta davart la planisaziun dal territori. Questa argumentaziun vegn cumbattida vehementain dals adversaris. Els argumenteschan ch'in stop rigurus da las zonas da construc-

ziun saja radical e na tegnia betg quint dals basegns da la populaziun e da l'economia sco era da las differenzas chantunales e regiunalas. In tal stop da svilup fissia da donn per l'entira Svizra. La finala

na decidan dentant betg prognosas e retschertgas, mabain sulettain il resultat da la votaziun dal pievel dals 10 da favrer.

➤ COMMENTARI E PAGINA 3

Autos donnegiads cumplet

Auto da Posta tschertga vehichels per garantir il manaschi

■ (anr/ac) In incendi ha destrui la mesemna saira almain la mesadad da la flotta dals autos da posta staziunads a Cuira. Dals 20 autos da posta destruids cumplet èn sulet anc ruinas restadas. Mesemna saira curt avant las nov ha in incendi en la halla da parcar dal Servetsch autopostal Grischun alarmà ils pumiers da la chapitala grischuna. Il fazit da quel incendi èn 20 autos da posta donnegiads cumplet e trais parzialmain ed ina summa da donn da circa 7,5 milliuns francs. La halla da parcar è medemmain donnegiada ferm.

Ils pumiers han pudì impedir ch'il feu sa derasia sin las abitaziuns vischinantas e donnegieschia il tancadi dals autos da posta. Consequentmain n'èn naginas persunas vegnidas feridas. In policist ha stui ir en il spital per via da problems da respirar. Bain ha il pledader da la polizia chantunala confermà vers Blick online ch'in auto da posta haja cumenzà a brischar, il motiv da quel brischant vegnia pir examinà. Actualmain è il servetsch auto-

postal londervi dad organisar autos da posta da l'entira Svizra per segirar la purschida dal traffic public en il Grischun. A curta vista han ils interpretidiers dad

auto da posta en las regions tramess vehichels da reserva a Cuira. Quels autos da posta da reserva dovran ils servetschs regiunalas dentant per segirar lur agen ma-

naschi. Remplazzar ils autos da posta donnegiads cun novs vehichels cuzza ogtg enfin diesch mais.

➤ PAGINA 5



Ils pumiers han pudì impedir ch'il feu sa derasia sin las abitaziuns vischinantas da la halla dals autos da posta enamez Cuira.

FOTO POLIZIA CHANTUNALA

COMMENTARI

Memia radicala e centralistica

DA MARTIN CABALZAR

Igl ei senza dubi impurtant da schanegiar natira e cuntrada e da nezegiar cun precauziun il terren cultivabel. Damai ch'il terren stat buc a disposiziun illimitada-mein eis ei necessari d'haver quitau dad el. Quella maxima ei denton buca vegnida risguardada e respectada dapertut, aschia che certas correcturas ein giustificadas ed era necessarias. Il suveran ha prevegniu a quei malesser cun approbar la revisiun dalla lescha davart la planisaziun dil territori. Zonas da bajegiar memia grondas ston vegnir reducidas ed astgan cumpigliar mo ton terren sco quei ch'ei vegn probabel duvrau enteifer ils proxims 15 onns. Ils cantuns ein actualmain lundervi da realisar questas prescripziuns relaschadas sin plaun federal.

In stop rigurus e nundifferenziu dallas zonas da bajegiar per temps illimitau tegn denton buca quen dils basegns e dall'economia ed ignorescha las differenzas cantunales e regiunalas. Turitg ei buca Lumnezia e Lumnezia buca Turitg. Ina mesira talmeins radicala e centralistica havess ultra da quei igl effect ch'il terren da bajegiar fuss en biars loghens fetg scarts, aschia ch'ils prezis da terren vegnessen a crescer da maniera exorbitanta. L'iniziativa freina buca construcziuns disordinadas, anzi, ella transferscha biaronz l'activitad da bajegiar en zonas periferas ni nunadattadas. S'entelli ch'era la concretisaziun ed applicaziun pratica dall'iniziativa caschunass dabia rum-patesta als responsabls.

I stop radical per zonas da bajegiar castigass gest cantuns e vischnauncas ch'han inzonau cun precauziun e disponan perquei da zonas fetg mudestas. Quei ei malgest. L'iniziativa ei plinavon centralistica e nundifferenziada, ella cunterterfa al federalissem ed al principi da subsidiarità. Perquei mereta ella in na all'urna ils 12 da fevrer.

martin.cabalzar@somedia.ch